

21 DEC 2002

MAHATHIR-SOROS/I

MAHATHIR: SABITAN KE ATAS SOROS BUKTIKAN DIA ADALAH PENGACAU SEBENAR

Oleh: Wan Nurzila Wan Abdul Rahman

ALOR SETAR, 21 Dis (Bernama) -- Datuk Seri Dr Mahathir Mohamad berkata hari ini bahawa sabitan ke atas pemodal AS George Soros mengenai urusan niaga dalam di sebuah mahkamah Peranchis membuktikan bahawa dia adalah pengacau sebenar kepada ekonomi dunia.

Perdana Menteri, yang telah menuduh dana-dana lindung nilai yang dimiliki oleh Soros membuat spekulasi terhadap matawang-matawang serantau termasuk ringgit yang mengakibatkan krisis kewangan Asia 1997, berkata beliau gembira yang "Soros akhirnya disabitkan kesalahan kerana perbuatan salahnya."

"Ia menunjukkan bahawa dia tidak begitu beretika," kata Dr Mahathir apabila mengulas laporan yang Soros disabitkan kesalahan mengenai dagangan dalam oleh sebuah mahkamah di Paris semalam dan dijatuhi hukuman denda 2.2 juta euro (RM8.4 juta).

Soros didapati bersalah menggunakan maklumat dalam mengenai satu serbuan korporat yang gagal pada 1988 ke atas Societe Generale untuk memperolehi AS\$2 juta (RM7.6 juta) ke atas stok syarikat itu.

Soros telah menafikan dakwaan itu.

Dr Mahathir, yang bercakap kepada pemberita selepas pembukaan Dewan Wawasan baru di Jitra diikuti dengan rumah terbuka Hari Raya berkata:

"Bila dia (Soros) kata yang saya adalah pengacau kepada negara saya sendiri, sebenarnya dialah pengacau kepada ekonomi dunia."

"Saya gembira mendengarnya (sabitan)," kata Dr Mahathir.

Dilahirkan di Hungary, Soros, 72, dipersalahkan kerana spekulasi melampau terhadap matawang-matawang serantau pada Julai 1997 yang menyebabkan krisis ekonomi dan kemelesetan yang mana sesetengah ekonomi belum lagi pulih daripadanya sepenuhnya.

Krisis matawang itu meletus pada Julai 1997 berikutan serangan ke atas baht Thai.

Sungguhpun asas-asas ekonomi Asia adalah kukuh, ringgit dan matawang-matawang serantau lain juga terjejas akibat spekulasi yang sengit.

Pada satu ketika pada 1998, unit Malaysia itu susut nilai kepada serendah RM5.20 berbanding dolar daripada setinggi RM2.42 sebelum krisis itu.

Untuk melandas ekonominya, Malaysia mengenakan kawalan modal di luar kebiasaan pada Sept 1998 termasuk menambat ringgit pada RM3.80 kepada setiap dolar AS.

Ini memberikan ikatan kestabilan yang penting dan melandas matawang dan ekonomi terhadap serangan-serangan spekulatif oleh dana-dana lindung nilai dan spekulator-spekulator tidak bertanggung jawab.

IMF, yang pada permulaannya mengutuk tambatan itu apabila ia diperkenalkan, kini mengiktiraf tambatan itu sebagai peneraju kestabilan yang selaras dengan asas-asas ekonomi.

Sungguhpun demikian, satu laporan IMF baru-baru ini menyarankan supaya Malaysia melepaskan tambatan ringgit secara beransur-ansur.

Dr Mahathir telah menolak saranan IMF itu, sambil menyatakan bahawa Malaysia harus menentukan kadar tukaran wangnya sendiri tidak sebaliknya mengapungkannya dan membolehkan diserang sekali lagi oleh spekulator.

Perdana Menteri telah berkata bahawa tiada jaminan yang ringgit tidak akan diserang sekali lagi yang kenapa beliau telah menggesa diadakan usaha-usaha untuk membendung spekulator tukaran wang asing.

Ke arah matlamat itu, Malaysia sentiasa menggesa IMF merangka satu

Arkitektur Kewangan Antarabangsa baru yang akan mengurung dana-dana lindung nilai spekulatif yang tidak bertanggung jawab.

Tiada kejayaan besar dibuat ke arah itu disebabkan bangkangan daripada ekonomi-ekonomi maju.

Di samping itu, Malaysia telah menyatakan bahawa nilai ringgit terpaksa susut nilai atau naik nilai sebanyak 20 peratus untuk tempoh yang berkekalan sebelum kerajaan menimbangkan menukarnya, tetapi itu tidak bermakna ia akan melepaskan tambatan matawang itu. -- BERNAMA

WNZ MR OS